

Na osnovu člana 14. stav 3. Zakona o sistemu indirektnog oporezivanja u Bosni i Hercegovini ("Službeni glasnik BiH", broj 44/03 i 52/04), a imajući u vidu odredbe člana 1. stav 1. i člana 85. stav 2. Zakona o carinskoj politici Bosne i Hercegovine ("Službeni glasnik BiH", broj 57/04), Upravni odbor Uprave za indirektno oporezivanje, na 53. sjednici održanoj 31.01.2006. godine, donio je

O D L U K U

O KRITERIJIMA ZA KORIŠTENJE SVEBUHVATNE GARANCIJE NA NIŽI IZNOS ZA OBEZBJEĐENJE PLAĆANJA INDIREKTNIH POREZA U UNUTRAŠNJOJ OBRADI

Član 1. (Predmet)

Ovom odlukom bliže se reguliraju kriteriji za korištenje svebuhvatne garancije na niži iznos za obezbjeđenje plaćanja indirektnih poreza u carinskom postupku unutrašnje obrade i postupak odobravanja takvog korištenja garancije.

Član 2. (Kriteriji)

Nosiocu odobrenja za unutrašnju obradu, može se na njegov zahtjev, odobriti korištenje svebuhvatne garancije na niži iznos za obezbjeđenje plaćanja indirektnih poreza u carinskom postupku unutrašnje obrade i to na 30% od ukupno obračunatih indirektnih poreza u tom postupku (u daljnjem tekstu: povlašteni status), ako ispunjava sljedeće uslove:

- a) da je u obračunskom periodu koji neposredno prethodi podnošenju zahtjeva pozitivno poslovaao, i da pozitivno posluje i u toku korištenja odobrenog povlaštenog statusa,
- b) da je u periodu od 12 mjeseci koji neposredno prethodi podnošenju zahtjeva uredno i na vrijeme izmirivao svoje obaveze po osnovu indirektnih poreza nastalih u bilo kojem carinski odobrenom postupanju ili upotrebi i da isti nisu u tom periodu naplaćivani aktiviranjem podnijete bankovne garancije,
- c) da u vrijeme podnošenja zahtjeva nema neizmirenih obaveza po osnovu indirektnih i direktnih poreza,
- d) da izrada kompenzirajućeg proizvoda predstavlja proizvodni proces koji se mora u punom kapacitetu odvijati bez prekida i za koji repromaterijal također mora u dovoljnim količinama biti kontinuirano obezbjeđen i
- e) da sav uvezeni repromaterijal iskoristi za proizvodnju kompenzirajućih proizvoda koje će u cijelosti ponovno izvesti iz carinskog područja Bosne i Hercegovine.

Član 3. (Izuzeci od odobravanja)

Povlašteni status ne odnosi se na robu koja povlači veći rizik prijevare iz Priloga 25. Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", broj 63a/04).

Član 4.
(Podnošenje zahtjeva)

(1) Povlašteni status ostvaruje se na osnovu pisanog zahtjeva nosioca odobrenja za unutrašnju obradu.

(2) Zahtjev iz stava (1) ovog člana, sa dokazima o ispunjavanju propisanih uslova, podnosi se Sektoru za poslovne usluge - Odsjeku za upravljanje dugom u Središnjem uredu Uprave za indirektno oporezivanje, koji odlučuje o zahtjevu.

Član 5.
(Dokazi o ispunjenosti uslova)

(1) U svrhu dokazivanja ispunjenosti uslova za korištenje povlaštenog statusa podnosilac zahtjeva, uz zahtjev, prilaže sljedeće:

- a) bilans stanja i uspjeha u obračunskom periodu koji neposredno prethodi podnošenju zahtjeva, propisno ovjeren od nadležnog organa,
- b) izjavu u pisanom obliku o tehnološkom procesu proizvodnje iz koje se vidi ispunjenost uslova iz člana 2. tačka d) ove odluke i
- c) izjavu u pisanom obliku da će sav uvezeni repromaterijal iskoristiti za proizvodnju kompenzirajućih proizvoda koje će u cijelosti ponovno izvesti iz carinskog područja Bosne i Hercegovine.

(2) Ispunjenost uslova iz člana 2. ove odluke koji se odnose na izmirenje obaveza po osnovu indirektnih poreza će, po službenoj dužnosti, provjeriti organ iz člana 4. stav 2. ove odluke. Dokaze o izmirenju obaveza po osnovu indirektnih poreza nastalih do 31.12.2005. godine za koje su nadležne porezne uprave Entiteta i Brčko Distrikta, kao i po osnovu direktnih poreza dužan je pribaviti i priložiti podnosilac zahtjeva.

(3) Podnosilac zahtjeva kojem bude odobren povlašteni status je, u toku korištenja istog, dužan redovno dostavljati dokaz o ispunjenosti uslova iz člana 2. tačke a) ove odluke.

Član 6.
(Obavještanje regionalnih centara)

Rješenje kojim je odobren povlašteni status dostavlja se svim regionalnim centrima.

Član 7.
(Ukidanje rješenja o povlaštenom statusu)

(1) Rješenje iz člana 6. ove odluke će biti ukinuto ako imalac tog rješenja uredno i na vrijeme u cijelosti ne izmiruje svoje obaveze po osnovu indirektnih poreza u bilo kojem carinski odobrenom postupanju ili upotrebi, kao i u slučaju saznanja o nastupanju okolnosti koje su protivne drugim propisanim uslovima iz člana 2. ove odluke.

(2) O nastupanju okolnosti iz stava (1) ove odluke imalac rješenja je dužan odmah obavijestiti organ iz člana 4. stav (2) ove odluke, što su dužne učiniti i organizacione jedinice Središnjeg uredu Uprave za indirektno oporezivanje i regionalnih centara koje u svom radu dođu do saznanja o tim okolnostima.

Član 8.
(Stupanje na snagu i objava)

Ova odluka stupa na snagu danom donošenja i objavit će se u "Službenom glasniku Bosne i Hercegovine".

Predsjednik Upravnog odbora
Joly Dixon